

राजमार्ग	थाहर	नक्शा	म्यूज़ियम
सन्हाकड़ा	धर्मपत्नी	उद्घाटन	चित्र
आलीशान	सुर्गबास	संघासन	इतिहासक
शिल्पकार	सपुत्तर	जातरू	थाहर

जम्मू-कश्मीर राजमार्ग पर मांडा नांऽ दा इक सन्हाकड़ा थाहर ऐ। उत्थै सज्जी भेठा बने दा इक आलीशान मैहल दर्शकें दा मन मोही लैदा ऐ। इस दा नांऽ 'अमर मैहल' ऐ। इसदे पिच्छें त'वी नदी बगदी ऐ। इत्थुआं सारा जम्मू नजरी औंदा ऐ।

अमर मैहल दा नक्शा 1862 ई. च फ्रांस देश दे इक शिल्पकार नै तयार कीता हा। इसगी महाराजा



रणबीर सिंह हुंदे लौहके पुत्तर राजा अमरसिंह होरें 1890 ई. च बनोआया हा। इस च महाराजा हरिसिंह हुंदी धर्मपत्नी श्रीमती

तारा देवी होर रौंहदियां हियां। 1967 ई. च उंदा सुर्गबास होई
गेआ। उंदे सपुत्तर डॉ. कर्ण सिंह ते नूह् श्रीमती यशोराज्य
लक्ष्मी होरें अमर मैह्ल हरि-तारा ट्रस्ट गी सौंपी दित्ता तां जे
इस मैह्ल गी इक म्यूज़ियम दे रूपा च बरतेआ जाऽ।

इस म्यूज़ियम दा विधि-विधान कन्नै उद्घाटन 1975 ई.
च बसाखी आह्ले दिन 13 अप्रैल गी उस बेल्ले दी प्रधानमंत्री
श्रीमती इंदिरा गांधी हुंदे द्वारा करोआया गेआ।

इस म्यूज़ियम च पंजी ज्हार कताबां, मतियां हारियां
कला-कृतियां रक्खियां गेई दियां न। इस च महाराजा हरिसिंह
हुंदा सुन्ने दा संघासन बी रक्खेआ गेदा ऐ। म्यूज़ियम दा सभनें
शा बड्डा हाल 'दरबार हाल' खुआंदा ऐ। इस च महाराजा
गुलाब सिंह हुंदे शा लेइयै डॉ. कर्ण सिंह ते राजमाता तारा देवी
ते श्रीमती यशोराज्य लक्ष्मी हुंदे चित्र दिक्खने जोग न।

'अमर मैह्ल म्यूज़ियम' जम्मू दा इक दर्शनी इतिहासक
थाह्र ऐ, जिसे दिक्खने आस्तै देश-विदेश थमां मते-हारे
जात्तरू औंदे रौंहदे न।

अभ्यास

1. हेठ दित्ते दे सुआलें दे जवाब लिखो :-
(क) अमर मैह्ल म्यूज़ियम कुंत्यै बने दा ऐ?
(ख) इस बिच्च केहड़ियां चीजां रक्खियां गेदियां न?

- (ग) जिस अमर मैहल च म्यूज़ियम बने दा ऐ, उसगी कुसने बनोआया हा?
- (घ) एह मैहल म्यूज़ियम लेई कुस ट्रस्ट गी सौंपेआ गेदा ऐ?
- (ङ) अमर मैहल म्यूज़ियम दा उद्घाटन कुसने कीता हा ते कटूं कीता हा?

उद्देश्य : पाठै दा चेता दरहाना।

2. इस पाठ च आए दे व्यक्तियें ते थाहरें दे नांऽ पढ़ो ते लिखो:-

व्यक्तियें दे नांऽ	थाहरें दे नांऽ
(क) महाराजा रणबीर सिंह	मांडा
(ख) राजा अमर सिंह	जम्मू
(ग) डॉ. कर्ण सिंह	कश्मीर
(घ) राजमाता तारा देवी	फ्रांस
(ङ) श्रीमती यशोराज्य लक्ष्मी	अमर मैहल

उद्देश्य : व्यक्तिवाचक संज्ञा दे ज्ञान गी सुदृढ़ करना।

3. हेठ दित्ते दे शब्दें कन्नै वाक्य पूरे करो :-

सन्हाकड़ा, त'वी, जम्मू, सुर्गबास, उद्घाटन

- (क) जम्मू कश्मीर राजमार्ग पर मांडा नांऽ दा थाहर ऐ।
- (ख) इसदे पिच्छें नदी बगदी ऐ।
- (ग) 1967 ई. च महारानी तारा देवी हुंदा होई गेआ।
- (घ) इत्थुआं सारा नजरी औंदा ऐ।
- (ङ) इस म्यूज़ियम दा 1975 ई. च करोआया गेआ।

उद्देश्य : स्हेई शब्दे कन्ने वाक्य-पूर्ति दा अभ्यास।

4. स्हेई वाक्य अगें ✓ ते गलत अगें ✗ दा नशान लाओ:-

- (क) अमर मैहल दा नक्शा अमरीका दे शिल्पकार नै तयार कीता हा। ☐
- (ख) इसी राजा अमर सिंह होरें बनोआया हा। ☐
- (ग) इस मैहल गी म्यूज़ियम बनाने लेई हरि-तारा ट्रस्ट गी सौंपी दित्ता गेआ। ☐
- (घ) इस म्यूज़ियम च इक लक्ख कताबां न। ☐
- (ङ) इस दा उद्घाटन बसाखी आहले रोज 1975 ई. च होआ हा। ☐

उद्देश्य : विचार-शक्ति दा विकास।

5. हेठ दित्ते दे शब्दे गी शुद्ध रूपें च लिखो :-

राजमार्ग		माडां	
आलिशान		पीच्छें	
मेहल		सुगर्बास	
धमर्पत्ति		शील्पकार	

उद्देश्य : स्हेई हिज्जे ते स्हेई लेखन दा अभ्यास।

अध्यापकें आस्तै निर्देश

इस पाठ च बरतोई दियें व्यक्तिवाचक संज्ञाएं दा अभ्यास दर्हांदे होई अध्यापकें गी चाहिदा ऐ जे ओह होर बी खास थाहरें, पुस्तकें, नदियें, फ़ाड़ें, दरेआएं, नेताएं बगैरा दे नांऽ दसदे होई विद्यार्थियें गी व्यक्तिवाचक संज्ञा दा अभ्यास पक्का करान।